

होसे

होसे क जरिये यहोवा परमेस्वर क सन्देश

1 इ यहोवा क उ सन्देश अहइ, जउन बेरी क पूत होसे क जरिये मिला रहा। इ सन्देश उ समइ आवा रहा जब यहूदा में उज्जियाह, योताम, आहाज अउ हिजकिय्याह क राज्ज रहा। इ ओन दिनन क बात अहइ जब इस्राएल क राजा योआस क पूत यारोबाम क समइ रहा।

2होसे बरे इ यहोवा क पहिला सन्देश रहा। यहोवा कहेस, “जा, अउर एक रण्डी स बियाह कइ ल्या जउन आपन रण्डीबाजी स संतान रखेस ह। काहेकि इ देस क लोग रण्डी क तरह बेउहार करत अहई। उ पचे यहोवा बरे अबिस्सासी रहेन ह।”

यिज्जेल क जनम

3तउ होसे दिबलैम क बिटिया गोमेर स बियाह कइ लिहस। गोमेर गर्भवती भइ अउर उ होसे बरे एक तु पूत क जनम दिहस। 4यहोवा होसे स कहेस, “एकर नाउँ यिज्जेल राखा। काहे? काहेकि मई हाली ही यिज्जेल घाटी में कीन्ह गइन हत्या बरे येहू क परिवार क सजा देब फिन एकरे पाछे इस्राएल क बंस क राज्ज क खतम कइ देबउँ। 5उहइ समइ यिज्जेल घाटी में, मई इस्राएल क धनुस क तोड़ देब।”

लोरुहामा क जनम

6एकरे पाछे गोमोर फुन गर्भवती भइ अउर एक तु कन्या क जन्म दिहस। यहोवा होसे स कहेस, “इ कन्या क नाउँ लोरुहामा राखा। काहेकि मई अब इस्राएल क लोगन पइ अउर जियादा दया नहीं देख्वाउब। मई ओनका छिमा नहीं करब। 7मुला मई तउ यहोवा क राज्ज पइ दया देख्वाउब। मई यहूदा क लोगन क रच्छा करब। मुला ओकरी रच्छा बरे मई न तउ धनुस अउर तरवार क प्रयोग करब अउर न ही जुद्ध क घोड़न अउर फउजियन क। मई, यहोवा, खुद आपन सक्ती स ओनका बचाउब।”

लोअम्मी क जनम

8गोमेर अबहीं लोरुहामा क दूध पिआउब तजे ही रही कि उ फुन गर्भवती होइ गइ। तउ उ एक तु पूत क जनम दिहस। 9एकरे पाछे यहोवा कहेस, “एकर नाउँ लोअम्मी धरा। काहेकि तू पचे मोर प्रजा नहीं अहा अउर मई तोहार परमेस्वर नहीं अहउँ।”

परमेस्वर यहोवा क बचन: इस्राएली बेगिनती क होइहीं

10“तउ पइ भी, भविस्स में, इस्राएल में अनगिनत लोग होइहीं जइसा सागरे क रेत क कन जउन न तउ नापी जाइ

सकत ह अउर न ही जेकर गनती कीन्ह जाइ सकत ह। अउर उहइ जगह पइ जहाँ ओनसे इ कहा ग रहा, ‘तू पचे मोर लोग नहीं अहा।’ उ पचन्क कहा जाईहीं, ‘तू पचे जिअत परमेस्वर क संतान अहा।’

11“तउ फुन यहूदा अउ इस्राएल क लोग एक संग ऐकटठा होइ जइहीं। उ पचे आपन खातिर एक सासक क चुनाव करिहीं अउर ओकरे लगे आपन पहुँटा होइहीं। यिज्जेल क दिन असल में एक महान दिन होइ।”

2“आपन भाइयन स कहा: ‘हम पचे एक ही लोग अहइ (अम्मी) अउर आपन बहिनियन क कहा, ‘यहोवा हम पचन पइ दयालु(रूहामा) अहइ।’”

इस्राएल क जाति स यहोवा क कहब

2“आपन महतारी क खिलाफ एक सिकायत करा, काहेकि उ मोर पत्नी नहीं अहइ अउर न ही मई ओकर भतार अहउँ। ओका अदालत में लइ जा, तउ उ रण्डी जइसा बेउहार करइ छोड़ देइ अउर ओकरे प्रेमियन क ओकरे छातियन क बीच स दूर हटाइ देइ। 3अगर उ आपन इ रण्डीबाजी क छोड़इ स इन्कार करी, तउ मई ओका एकदम्मइ नंगा कइ देब। मई ओका वइसा ही प्रदर्शित करब जइसा उ पइदा भएका दिना रहेन। मई ओका सूखा रेगिस्तान क जइसा बनाब अउर मई ओका पिआसा मार देब। 4मई ओकरी संतानन पइ कउनो दया नहीं देख्वाउब काहेकि उ पचे रण्डीबाजी क संतान होइहीं। 5ओनकर महतारी रण्डी क नाई आचरण किहस ह। उ जउन ओनका गरभधारन किहेस ह मोर बरे लज्जा लिआएस, काहेकि उ कहेस, ‘मई आपन प्रेमियन क संग चलब जउन मोका उ सबइ चिजियन देब जेकर मोका जरूर अहई। उ पचे मोका रोटी, पानी, ऊन, अउर सन, तेल अउ दाखरस देत ही।’

6“एह बरे, मई तोहार रास्ता काँटन स बन्द करब! मई ओकरे रास्ता क रोकइ बरे एक तु देवार खड़ी करब, जेहसे उ आपन रास्ता ही नहीं पाइ सकिहीं। 7जदपि उ आपन प्रेमियन क पाछे भागिहीं, लेकिन उ ओन तक नहीं पहुँच सकिहीं। जदपि उ ओनका हेरिहीं, लेकिन उ ओनका नहीं पाइ सकिहीं। फुन उ कहिहीं, ‘मई आपन पहिले क भतार क लगे लौटि जाब काहेकि मोर पहिले क जिन्नगी मौजूदा जिन्नगी स बहोत अच्छा रहेन।’

8“किन्तु उ नहीं जानत रही कि उ मई ही रहा जउन ओका अन्न, दाखरस अउ तेल देत रहेउँ। मई ओका बहोत सारा चाँदी अउ सोना देत रहत रहेउँ, किन्तु ओकर प्रयोग बाल क मूर्तियन बनावइ में किहन। 9एह बरे मई वापस आउब अउर आपन अनाज क उ समइ लइ लेब जब उ

काटइ बरे तइयार होइ अउर मई आपन दाखरस क काटइ क मोसम में लेब। अउर मई आपन ऊन अउ सन क ओढ़ना क भी वापस लइ लेब जेका मई ओकरे नंगेपन क ढकि बरे दिहे रहेन। 10अब मई ओका बेवस्त्र कइके नंगा कइ देब ताकि ओकर सबहिं पिरेमी ओका देखि सकइ। कउनो भी मनई ओका मोर सकती स बचाइ नाहीं पाई। 11मई ओहसे ओकर सारी हँसी खुसी छीन लेब। मई ओकर सालाना उत्सवन, नवा चाँद क दावतन अउ हफता क साबित क उत्सवन क खतम में लइ आउब। मई ओकर सबहिं खास दावतन क रोक देब। 12मई ओकर सबइ अंगूर क बेल अउर अंजीर क बृच्छन क भी नस्ट कइ देब। उ कहे रहेस, 'इ सबइ चिजियन मोर पिरेमी लोगन मोका दिहे रहेन।' मुला अब मई ओकरे बगियन क रेगिस्तान बदल देब। ओन बृच्छन स जंगली जानवर आइके आपन भूख मिटावा करिहीं।

13"उ बाल क सेवा किया करत रही, एह बरे मई ओका दण्ड देब। उ बाल देवतन क अगवा धूप बारत रही। उ गहनन स सजत अउर नथुनी पहिरा करत रही। फिन उ आपन पिरेमियन क लगे जात रही अउ मोका बिसर जात रही।" इ उ अहइ जउन यहोवा कहे रहा।

14"एह बरे, मई ओका लुभावइ बरे जात हउँ। मई ओका रेगिस्तान में लइ जाब अउर मई खुद ओह पइ जीतब। 15मई ओन रेगिस्तान में ओकरे बरे अंगूरे क बगियन बनाउब। मई आकोर क घाटी क आसा क दुआर बनाइ देब। फुन उ मोका उहइ तरह उत्तर देइ जइसे उ समइ दिया करत रही जब उ जवान रही अउर जब मई ओका मिस्त्र स बाहेर लिआए रहेस।" 16यहोवा कहत ह:

"उ अवसर पइ, तू मोका 'मोर भतार' कहिके पुकरब्या। तब तू जियादा समइ तलक मोका 'मोर सुआमी' नाहीं कहबू।* 17मई बाल देवतन क नामन क ओकरे मुँह पइसे दूर हटाइ देब। फुन एक भी मनई बाल देवतन क नाउँ नाहीं लिया करिहीं।

18"फुन, मई इस्त्राएल क लोगन बरे जंगल क जनावरन, आकासे क पंछियन, अउर धरती पइ रेंगइवालन प्राणियन क संग एक वाचा करब। मई धनुस, तलवार अउर जुद्ध क अस्त्रन क तोड़ फेंकब। कउनो अस्त्र-सस्त्र उ भुईया पइ नाहीं बचि रहइ। मई उ भुईया क सुरच्छित बनाइ देब जेहसे इस्त्राएल क लोग सान्ति क संग विस्त्राम कइ सकिहीं। 19मई तोहका सदा-सदा बरे आपन दुलहिन क रूप में लइ लेब। मई प्रतिग्या करत हउँ कि तोहका नेकी, खरेपन, पिरेम अउर दयालुता क संग आपन दुलहिन बनाइ लेब। 20मई तोहका आपन बिस्सासी दुलहिन बनाइ लेब अउर मई तोहार बिस्सासी होइ बरे प्रतिग्या करब। तब तू सचमुच यहोवा क जान जाबू।" 21यहोवा कहत ह, "उ दिना मई आकास क उत्तर देब अउर आकास धरती क उत्तर देब्या।"

मोर भतार ... मोर सुआमी इस्त्राएल क मेहररुअन इ दुइ सब्द क प्रयोग आमतौर स आपन भतार बरे किहे रहेन। हिब्रू भाखा में सब्द "सुआमी" बरे "बाल" सब्द रहा। बाल कनानियन क देवता भी रहा। होसे हिआँ बाल सब्द क प्रयोग इस्त्राएलियन क सरापइ बरे किहेस ह जउन बाल देवता क पूजा किहे रहेन।

22धरती अन्न, नवा दाखरस अउर उत्तम तेल स उत्तर देइहीं। उ पचे यिज्रेल क उत्तर देइहीं।

23मई भुईया में इस्त्राएल क आपन बरे लगाउब। मई लोरुहामा पइ दया देखौउब: मई लोअम्मी स कहब, 'तू मोर प्रजा अहा।' अउर उ पचे मोहसे कहिहीं, 'तू हमार परमेस्सर अहा।'"

होसे क गोमेर क गुलामी स छोड़उब

3 तउ यहोवा मोसे कहेस: "फुन जा अउर उ बिभिचारी मेहरारू स पिरेम कर जउन कउनो दूसर क प्रेमी अहइ। ठीक इसी तरह यहोवा इस्त्राएलियन क परिम करत ह भले ही उ पचे दूसर देवतन क तरफ मुर्त हीं अउर किसमिस देइ पसंद करत हीं।"

2यह बरे मई ओका पन्द्रह चाँदी क सिक्कन अउर तीन सौ किलोग्राम जौ देइके खरीद लिहेस ह। 3तउ मई ओसे कहा: "तोहका मोरे संग बहोत अधिक समइ तलक रहइ चाही। तोहका कउनो रण्डी जइसा हरकत नाहीं करइ चाही अउर कउनो दूसर मनइ क संग नाहीं रहइ चाही। मई अकेल्ला ही तोहार भतार होब।" 4इहइ तरह, इस्त्राएल क लोग बहोत दिनन तलक बिना कउनो राजा या मुखिया क रइहीं। उ पचे बिना कउनो बलिदान क रहिहीं अउर उ पचे कउनो पाथर क खम्भा खड़ा नाहीं करिहीं। उ पचे भविस्सवाणी करइ बरे कउनो एपोद क प्रयोग नाहीं करिहीं अउर ओनकर लगे कउनो गृह देवता भी नाहीं होइहीं। 5एँकरे बाद इस्त्राएल क लोग वापस लउटि अइहीं अउ यहोवा आपन परमेस्सर क खोजिहीं अउर आपन राजा जउन राजा दाऊद क परिवार समूह स आएस, खोज करिहीं। भविस्स्य में, उ पचे आपन आपका यहोवा समर्पित करिहीं अउर ओकरे आसीर्बादन क लेइहीं।

इस्त्राएल पइ यहोवा क किरोध

4 हे इस्त्राएल क लोगो, यहोवा क सँदेस क सुना। यहोवा इ देस में रहइवालन क अदालत लइ जात हीं काहेकि उ पचे परमेस्सर संग कीन्ह भवा करार क प्रति विस्सासी अउ वफ़ादार नाहीं रहेस ह। वास्तव में इ देस क लोगन परमेस्सर क जानतेन ही नाहीं। 2उ पचे सराप, झूठ, चोरी, बिभिचारी, अहिंसा अउर रक्तपात में मसगूल अहइ। 3परिणाम, भुईया विलाप करब्या, अउर एकरे सबहिं निवासियन नस्ट कीन्ह जाब्या। जंगल क जनावरन, आकास क पंछियन अउर सागर क मछरियन तलक भी नस्ट कीन्ह जाब्या।

पापी याजकता क खिलाफ यहोवा क बिरोध

4मई कउनो दूसर पइ आरोप जिन लगावत हउँ! हे याजकन, मई इ सबइ बातन बरे तोह पइ आरोप लगात हउँ। इहइ कारण मोर मुकद्दमा तोहार खिलाफ अहइ।*

इहइ ... अहइ साब्दिक अरथ "कउनो क भी न इलज़ाम लगाइ द्या। अउर न ही फटकारइ द्या। तू ओन लोगन क नाई अहा जउन याजकन पइ इलज़ाम लगावत ह।" इ पद समुझइ बरे बहोत ही कठिन अहइ।

5हे याजकन, तू दिना में ठोकर खाउब्या, किन्तू तू अउर नबी दुइनउँ रात क समइ में ठोकर खाउब्या। तू आपन लोगन क ही बर्बाद कइ दिहेस ह।*

6“मोर प्रजा क बिनास भवा काहेकि ओन लोग मोका यहोवा क रूप में स्वीकार नाहीं किहेस, कारण याजक मोका स्वीकार करइ स इन्कार किहेस। यह बरे मई तोहका आपन याजक क रूप में स्वीकार नाहीं करब। तू आपन परमेस्सर क बिसरि दिहा ह एह बरे मई तोहरी संतानन क बिसरि जाब। 7उ पचे मोर खिलाफ जेतैना पाप किहेस ओतैना ही घमण्डी होइ गएन। यह बरे मई ओनकर महिमा क लज्जा में बदल देब।

8“याजक क रूप में, उ पचक लोगन क पाप भेंटन क खाएस ह। उ पचे चाहेस कि लोग जियादा स जियादा पाप करी। 9याजकन अउर लोगन क संग एक ही तरह क बेउहार कीन्ह जाब्या। मई ओनका ओकरे पाप क कारण सजा देबउँ। मई ओनसे ओनकर बुरे करमन क बदला लेबउँ। 10उ पचे खइहीं मुला उ पचे संतुट्ट न होइ। उ पचे रण्डीबाजी करिहीं, मुला ओनकइ आबादी न बढ़िहीं। काहेकि उ पचे यहोवा क तजेन ह, अउर उ पचे अबिस्सासी होइके आपन क दूसर देवतन क समर्पित कइ दिहेस ह।

11“नई दाखरस अउर पूराना दाखरस ओन लोगन स ओनकर तर्क-सक्ती क लइ लेत ह। 12मोर लोग काठे क मूरती स राय मोंगत हीं। ओकर बिस्सास अहई कि जादूई छड़ी ओकरे भविष्य क बारे में बताई सकत ह। ओन देवतन क संग ओकरे बिभिचारी ओनका भटकइ दिहेस ह। उ पचे रण्डी क रहइ बरे उ पचे आपन परमेस्सर क तजि दिहेन। 13उ पचे पहाड़न क चोटियन पइ बलि चढ़वत ह। उ पचे बलूत, चिनार अउ दूसर लम्बा बृच्छन क तरे धूप बारत ह। ओन बृच्छन क तरखाले क छाया नीक देखैत रही। एह बरे तोहार बिटियन ओन बृच्छन क तरे खूद रण्डीबाजी करइ बरे सोअत ह अउर तोहार बहुअन हुआँ पापे स भरा यौनाचार करत हीं।

14“मई तोहार बिटियन अउ बहुअन क एह बरे सजा नाहीं देब कि उ पचे रण्डी क जइसा रहइ के बिभिचारी क काम किहेन ह। काहेकि मनइयन खुद ही रण्डियन क संग यौन सम्बंध बनाएस ह अउर मंदिर क रण्डियन दुआरा बलि चढ़ावत हीं। यह बरे इ कहावत सच अहइ: उ रास्ट्र जउन समझ नाहीं राखत ह ओका बर्बाद कइ दीन्ह जाब्या।

इस्त्राएल क लज्जा स भरा भवा पाप

15“हे इस्त्राएल, तउ प भी तू एक ठु रण्डी क नाई रहत अहा, मोका आसा अहइ कि यहूदा कसूरवार भि नाहीं होइ। यहूदा, तू गिलगाल में दाखिल जिन भवा अउर बेतावेन तलक जिन जा। यहोवा क नाउँ पइ किरिया जिन खा इ जिन कहा: ‘यहोवा क जिन्गी क किरिया, मई प्रतिग्या करत हउँ।’ 16इस्त्राएल एक ठु जवान हट्टी गाय क नाई बिद्रोह किहेन ह। हाली ही यहोवा ओनका चरागाह में गरोड़िया क नाई लेइ जाइहीं आपन मेमना क बिसाल घास क मइदान में

तू ... दिहेस ह मई तोहार महतारी क बर्बाद कइ दिहेस ह।

चरइ देत ह। 17एप्रैम भी ओकर मूरतियन में ओकर संगी बन गवा। तउ ओका अकेल्ले तजि द्या।

18“जब उ पचे दाखरस पिअइ खतम कइ देब, उ पचे आपन रण्डीपन क प्रथा जारी राखब; उ पचे आपन लज्जावाला कामन स बहोत खुस होब। 19एक बवण्डर इस्त्राएल क आपन पाखन में उड़ाइ लेइ जाब, अउर ओका लेइ जाब काहेकि उ मूरतियन क भेंट किहेस ह।”

मुखिया लोग इस्त्राएल अउ यहूदा स पाप करवाएन

5 “याजकन, सुना! इस्त्राएल क परिवार, धियान दे! साही परिवार, सुना!

“जदपि तू पचे अइसा लुकान रहा जइसा कि मिसपा क फंदा में अहा अउर तू पचे ताबोर क धरती पइ फइलावा गवा फँदन क तरह अहा, मई तू सबइ क खिलाफ निआव करब। 2मई तू सबन क सजा देबउँ जदपि तू पचे सित्तम क गहरा खाई क नाई होइ। 3एप्रैम, मई जानत हउँ तू का करत ह। इस्त्राएल, तू मोसे छिपा भवा नाहीं बा। एप्रैम लखा, इस्त्राएल अपवित्तर अहइ काहेकि उ रण्डी क नाई हरकत करत आवत ह। 4इस्त्राएल इ सबइ कुकरम कइके आपन क परमेस्सर क लगे लउटइ स रोकत अहई। उ पचे मूरती पूजा करइ क मजबूत इच्छा रखत ह* उ पचे यहोवा क नाहीं जनतेन। 5जउन बातन इस्त्राएल क गोरव बनावत रही उ ही ओकरे बरे लज्जा लाइहीं। इस्त्राएल आपन अपराध क कारण ठोकर खावत ह। यहूदा भी ओकरे संग ठोकर खावत ह।

6“इस्त्राएल क लोग ‘भेड़िन’ अउर ‘गइयन’ क साथ लइके यहोवा क बलि चढ़ावइ बरे हेरइ बरे निकरि। मुला उ पचे ओका नाहीं पाइ सकिहीं। तउ जान जाइहीं कि उ ओनसे दूर चला गवा अहई। 7यहोवा ओन पइ बिस्सास किहेन, मुला उ पचे ओकर संग धोखा किहेस। लखा, उ पचे अवैध गदेलन क जन्म दिहेस ह। हाली ही यहोवा ओनकर समुचइ फसलन क एक ठु महीना में ही दुस्मन क जरिये खतम करइ देब्या।”

इस्त्राएल क बिनास क भविस्सबाणी

8“गिबाह में नरसिंगाहा बजावा; रामा में तू तुरही बजावा। बेतावेन में जोरदार आवाज़ करा। हे बिन्यामीन, लखा!

9जब सजा क समइ आइ, एप्रैम पूरी तरह स बर्बाद कीन्ह जाब्या। तू निहचय होइ सकत ह कि मई इस्त्राएल क कबीला क बीच स जउन बोलत हउँ इ फुरइ अहइ।

10यहूदा क मुखिया उ मनई क तरह होइ जउन दूसर लोगन क भइया क लेइ बरे चउहददी क निसान क पाथरन खिसकावत ह। तउ मई ओह पइ आपन किरोध पानी क तरह उण्डेलब।

11एप्रैम क सजा दीन्ह जाइ, ओका कुचरि दीन्ह अउ मसरि दीन्ह जाइ जइसे अंगूरे क पीस दीन्ह जात ह। काहेकि उ निकम्मा क अनुसरण करइ क निहचइ किहेस ह।

उ पचे ... रखत ह साब्दिक अरथ ओनमा रण्डीबाजी क आतिमा अहइ।

12मई एप्रैम क अइसे नस्ट करब जइसे कउनो घुन कउनो काठे क नस्ट करत ह। अउर मई यहूदा क वइसे नस्ट करब जइसे जंग कउनो धातू क नस्ट करत ह।

13एप्रैम जान लिहैस कि उ रोगग्रस्त अहइ; यहूदा आपन घाव लखेस। एप्रैम अउर यहूदा अस्सूर क “महान रजा” क लगे मदद बरे गएन। किन्तु महान राजा तोहार रोग क नीक करइ मँ या तोहार घाव भरि मँ अस्सर्मथ रहेन।

14मई एप्रैम बरे एक सेर क नाई होब। मई यहूदा क संग एक जवान सेर क नाई हरकत करब। मई ओनका टुका मँ चीड़ देब अउर ओनका दूर लइ जाब। कउनो भी ओनका मोसा बचाइ नाहीं पाइ।

15फुन मई आपन जगह रहइ बरे लउट जाब जब तलक कि उ पचे आपन कसूर स्वीकार न करइ लेइ अउर मोका हेरत भए न आ जाइ। जब उ पचे विपदन मँ होइ, उ पचे मोका, मोह स मदद लेइ बरे हेइहीं।”

यहोवा कइँती लउटि आवइ क प्रतिफल

6 “आवा, हम यहोवा कइँती लउटि आइ। जदपि उ हमका टुका मँ चीड़ दिहैस ह, किन्तु उ हमका चंगा करी। जिस तरह उ हमका चोट किहैस, उहइ तरह उ हमार घावन पइ मरहम भी लगाई।

2दुइ दिना मँ उ हमार जिन्नगी वापिस देइ सकत ह। तीसरे दिन उ हमका आपन गोड़ मँ खड़ा करी, तउ हम ओकर मोजूदगी मँ रहब।

3आवा, ओका परमेस्सर क रूप मँ स्वीकार करा; आवा, उ सबइ करी जेसे हम यहोवा स्वीकार कइ सकत हीं। ओकर आवइ ओतना ही निहचइ ह जेतना कि भोर क आवइ। ओकर आवइ ओतना ही निहचय अहा जेतना क जाड़ा क बोछार। अवस्य ही उ वइसे ही आई जइसे कि बसंत क बर्खा आवति अहइ जउन धरती क सींच देत ह।”

लोग सच्चा नाहीं अहइँ

4“हे एप्रैम, तोहार संग मोका का करइ चाही? हे यहूदा, तोहरे संग मोका का करइ चाही? तोहार पिरेम ऐतना तेजी स गुजर गएन जइसा भिंसारे क कोहरा अउर भिंसारे क ओस तेजी स खत्म होइ जात ह।

5मई नबियन क प्रयोग किहैउँ अउर मनइयन बरे नेम बनाइ दिहैउँ। मोरे आदेस पइ मनइयन क कतल कीन्ह गवा मुला इ सबइ फइसलन स भली बातन पइव होइहीं।

6मोका विस्सासी पिरेम खुस करइ सकत ह, बलियन नाहीं जब लोग मोका परमेस्सर क रूप मँ जानत ह तउ इ मोका होमबलि स जियादा आनन्दित करत ह।

7उ जगह पइ जउन आदम कहलावत अहइ उ पचे करार तोड़ दिहस। उ भुइँया मँ उ पचे मोरे बरे अबिस्सासी रहेन।

8गिलाद ओन लोगन क नगरी अहइ जउन पाप किया करत हीं। हुआँ क लोग चालबाज अहइँ अउर उ पचे अउरन क हत्या करत हीं।

9याजक लोग भयानक अपराध किहेन। डाकून क दल जइसा कउने पइ हमला करइ बरे घात मँ छुपा रहत हीं।

लटेरन क जइसा उ पचे सकेम लोगन क राहे पइ हत्या किहेन।

10मई इस्राएल क मन्दिर मँ घृणित बात क लखेउँ ह। उहइ जगह पइ एप्रैम रण्डीबाजी किहेन अउर इस्राएल आपन क अपवितर किहैस।

11हे यहूदा, तोहार बरे भी फइसला क एक दिन तय कीन्ह ग अहइ।”

परमेस्सर इस्राएल क सज़ा नाहीं देइ

अगर उ पश्चाताप करत ह

7 “जब मई आपन लोगन क सज़ा देइ बन्द करब अउर जब मई ओनका बन्दी स वापिस लिआउब अउर इस्राएल क चंगा करब। तब लोग एप्रैम क पाप जान लेइहीं। अउर हरकोइ सोमरोन मँ लोगन क कीन्ह भवा बुरा कामन क बारे मँ जानइ लेइहीं: उ पचे लबार देवतन बनाएन, चोरन घरे मँ घुसेन, लुटेरन क दल गलियन मँ लोगन क लुटेन।

2उ पचे इ नाहीं जान पावत ह कि मई ओनकर बुरा कामन क याद रखत हउँ। ओका बिस्सास नाहीं करत ह कि हर एक चीज जउन उ किहैस मई ओका साफ-साफ लखेत हउँ।

3उ पचे आपन कुकरमन स आपन राजा क खुस करत हीं। ओकर लबार ओकरे मुखियन क खुस करत हीं।

4रोटी पकावइवाला रोटी बरे आटा मढ़त ह। मुला उ आगी क तब तलक नाहीं दहकावत जब तक कि गोंधा भवा आटा फूल न जाइ। मुला इस्राएल क लोग उ रोटी पकावइवाला क नाई नाहीं अहइ, उ पचे आपन उमंग हर समइ दहकावत ह।

5ओकरे राजा क उत्सव क दिन मँ, राजकुमार दाखरस पिअइ सुरु कइ दिहैस। राजा ओन लोगन क संग समझौता करत ह जउन ओकरे संग हँसी-मजाक करत हीं।

6उ पचे ओकरे लगे आवत ह। उ पचे ओनकर खिलाफ खुफिया साज़ि रचत ह। अउर उ तंदूर क नाई दहकत रहत हीं। सारी रात ओकर गुस्सा धीरे-धीरे पाकत ह, अउर भिंसार होत होत उ भभकत भवा आगी क नाई तेज होइ जात ह।

7उ पचे मूँइ भभकत भए तन्दूर क जइसा अहइँ; उ पचे आपन ही मुखियन क नस्ट कइ दिहेन ह। ओनकर सबइ राजा लोगनक पतन एक ही तरह स भवा रहा, मुला ओनमँ स कउनो भी परमेस्सर क मदद बरे कोहाइ क जतन नाहीं किहे रहेन।”

इस्राएल आपन नास स बेखबर

8“एप्रैम दूसर जातियन क संग घुल-मिल गएन, मुला इ अइसा होइ जइसा कि रोटी सिरिफ एक ही तरफ स सेंका गवा ह।

9बिदेसयन एप्रैम क ताकत निगल गएस ह, किन्तु उ ओका नाहीं जान पाए। ओकरे बार भी सफेद होइ लाग, किन्तु ओका एकर पता नाहीं चला।

10इस्राएल क आपन क घमंड ही ओह पइ इलज़ाम लगावत ह, लेकिन फिर भी उ यहोवा आपन परमेस्सर क

लगे नहीं लउट ह। जदपि इ सबइ बात घटिहीं, तउ प भी उ यहोवा क नहीं खोजिहीं।

11एप्रैम उ भोला कबूतरे क नाई बन गवा अहइ जेकरे लगे कछू भी समुझ नहीं होत ह। लोग मिस्र स मदद माँगेन अउर लोग अस्सूर क सरण मँ गएन।

12जहाँ कहूँ भी उ जाई, मई ओका आपन जाले मँ फँसाउब अउर मई ओनका अइसे खाले हींच लेबउँ जइसे अकासे क पंछी हींच लीन्ह जात हीं।

13ओह प हाय, काहेकि कि उ पचे मोका तजि दिहेस ह। उ पचे नस्ट होइ काहेकि उ मोर खिलाफ बिद्रोह किहेन ह। मोका ओनका बचाइ बरे कछू धन दीन्ह जाइ चाही रही अउर ओकर धियान दीन्ह जाइ चाहत रही, मुला उ पचे मोर बरे झूठ बोलत हीं।

14उ पचे पराथना मँ कबहुँ मोका पूरा हिरदइ स नहीं गोहँरान। उ पचे आपन बिछउना मँ अनाज अउर दाखरस बरे गोहँरवत हीं, अउर उ पचे दूसर देवतन बरे रीतियन क पूरा करत ह तउ आपन सरीर क घायल करत ह। उ पचे अपने पीठियन क मोर कइँती मोड़ दिहेस हीं।

15मई ओनका अनुसासन दिहे रहेउँ ह अउर ओनकर भुजा बलवान बनाए रहेउँ ह, मुला उ पचे मोरे विरोध मँ बुरा सइयंत्र रचेन।

16उ पचे पूजा बरे झूठे देवन कइँती मुड़ा भवा धनुस क नाई जउन फेंकइ क पस्चात वापस अवत हीं, क तरह मुड़ गएन ह। ओनकर मुखिया लोग आपन ही सक्ती क सेखी बघारत रहेन, मुला ओनका एक तरवार मउत क घाट उतारा जाइ। मिस्र मँ हर कोइ ओन पइ हँसिहीं।

मूर्ति पूजा स इस्त्राएल क विनास

8 “तुरही क आपन होंठन लगावा। यहोवा क भवन क ऊपर गिद्ध जइसा बनि जा,* काहेकि उ पचे मोर करार क तोड़ दिहन जउन ओकरे संग किहे रहेन। उ पचे मोर नेमन क खिलाफ अपराध किहेन ह। 2उ पचे गोहरावत, ‘हे इस्त्राएल क परमेस्सर, मई तोहका जानत हउँ।’ 3मुला इस्त्राएल हाय! उ भली बातन क नकार दिहस। इहइ स दुस्मन ओकरे पाछे पड़ि गवा ह। 4उ पचे बिना मोसा समपर्क किए भए आपन राजा चुनेन। मई उ मुखियन क अनुमोदन नहीं किहा जेका उ पचे चुने रहा। ओकर मुखियन ओकरे बरे सोना अउ चाँदी स मूर्तियन बनाए रहेन। एह बरे उ पचे नास कीन्ह जाब। 5हे सोमरोन, तोहरे बछवा-मूर्ती मोर बरे घृणित अहइ। मई एकर कारण बहोतइ कोहाइ हउँ। तू पचन्क एकरे कारण केतँना देरी तलक इ पाप क दोखी रहब? 6बछवा-मूर्ती इस्त्राएल क एक कारीगर दुआर बना ग रहेन अउर इ परमेस्सर नहीं, एह बरे सोमरोन क बछवा-मूर्ती क टूकन-टूकन मँ तोर दीन्ह जाइ। 7उ पचे बोइहीं जब हवा बहत हीं, अउर उ पचे काहिहीं जब चक्रवात चलिहीं। खेतन अनाज उगाइ मँ असर्मथ होइ। एह बरे हुवाँ खाइ बरे रोटी नहीं होइ। अगर भुइँया थोड़ बहोत अनाज उग भी तउ ओका दुस्मन आइ अउर निगल जाइहीं।

तुरही क ... बनि यहोवा क भवन क उपर रच्छक जइसा बनि जा।

8इस्त्राएल क रास्ट्रन क जरिये निगल लीन्ह गवा ह। एँकर लोग एक ठु अइसा बेकार क पात्र क नाई अहइ जउन बाहेर फेंक दीन्ह ग अहइ। रास्ट्रन क बीच स छितराइ दीन्ह गवा अहइ।

9इस्त्राएल अस्सूर जाइ बरे अइसा बल देत ह जइसे कउनो जंगली गदहा स्वयं ही भटकत फिरत ह। एप्रैम जातियन क बीच रण्डी क धन दिहेन।

10काहेकि इस्त्राएल जातियन क बीच रण्डी क धन दिहेन, अब मई सबन क आपुस मँ कछू समई बरे अस्सूर सम्राज क मातेहत ओकरे अत्याचार क झेलइ बरे बटोरब।”

इस्त्राएल क परमेस्सर क बिसरब अउ मूर्तियन क पूजब

11“जदपि पाप स छुकारा बरे एप्रैम जियादा स जियादा वेदियन क बनाए रहा, मुला उ पचे इ वेदियन क प्रयोग जियादा पाप करइ बरे करिहीं।

12जदपि मई एप्रैम क बहोत साफ-साफ नेमन लिख दिहे रहेउँ, तउ भी इ ओकरे बरे बिचित्र लागत ह।

13उ पचे ओसे बलि भेंट किहेन जउन मई ओनका दिहे रहा। उ पचे बलि भेंट किहेन अउर ओका खाएन जउन उ बलि दिहे रहेन। यहोवा इ लोगन स खुस नहीं अहइ। उ पचे ओकरे पापन क याद राखब, एह बरे उ ओका सज़ा देइहीं। ओनका बन्दी क रूप मँ मिस्र लइ जावा जाइ।

14इस्त्राएल आपन निर्माता क बिसरि गवा। इस्त्राएल जियादा स जियादा महल क बनाइहीं जब यहूदा गढ़वाले अनेक नगर बनाएन। एह बरे मई यहूदा क नगरी मँ ओकर महलन क बबदि करइ बरे ओकर खिफाल आगी पठउब।”

देस स निकारे भए क दुःख

9 हे इस्त्राएल, दूसर जातियन क तरह बहोत जियादा उत्सव पसन्द जिन करा। काहेकि तू मोर प्रति अविस्सासी होइ गवा ह अउर तू आपन परमेस्सर क दूर खड़ा होइ गवा ह। तू पचे लबार देवतन क वाचा क हर खरिहाने क धरती पइ पूरा करइ चाहत ह। 2मुला ओन खरिहानन स मिला भवा अनाज इस्त्राएल क पर्याप्त भोजन नहीं दइ पाइ। इस्त्राएल बरे पर्याप्त दाखरस भी नहीं रही।

3इस्त्राएल क लोग यहोवा क धरती पइ नहीं रहि पइहीं। एप्रैम मिस्र क लउटि जाइ। अस्सूर मँ ओनका वइसा खइया क खाइ पड़ी जइसा ओनका नहीं खाइ चाही। 4उ पचे यहोवा बरे अउर दाखरस क चढ़ावा नहीं चढ़इहीं। ओनकर बलियन ओका खुस नहीं करब, उ पचे दाह-संस्कार क रोटी क नाई होइहीं जउन एका खइहीं अपवितर होइ जइहीं। ओनकर रोटी सिरिफ ओकर भूख मिटाहीं, मुला यहोवा क मन्दिर मँ बलि नहीं होइहीं। 5नियत पर्व क दिन अउर यहोवा क उत्सव क दिन तू पचे का करिहीं?

6इस्त्राएल क लोग पूरी तरह स नस्ट होइ क डरे स अस्सूर क ग रहेन मुला मिस्र ओनका बटोरि क लइ लेइ। मोप क लोग ओनका गाड़ देइहीं। चाँदी स भरे ओनके खजानन पइ खरपतवार उगि आइ। ओनकर डेरन मँ, काँटेदार झाड़ी उगि अइहीं।

7निआव क दिन आइ गवा! सज़ा क दिन आइ गवा!
इस्त्राएल क एका जरूर जानइ चाही!

इस्त्राएल सच्चे नबियन क नकारेस

मुला उ पचे सोचत हीं कि नबी मूरख अहइ अउर आतिमा स प्रेरित जन पागल अहइ। तू आपन बहोत सारे पापन क कारण अउर काहेकि तू नबी क संदेस स घिना करत ह तू अइसा सोचत ह।

8नबी क कारज परमेस्सर बरे अइसा ही अहइ जइसा कउनो पहरेदार एप्रैम बरे पहरेदारी करत ह। मुला रस्ता अनेक फँदन स भरा भवा अहइ, काहेकि परमेस्सर क लोग तउ प भी हम स घिना करत हीं।

9उ पचे बहोत भरस्ट होइ गवा ह, ठीक वइसा ही जइसा गिबा क दिनन में होत रहेन। बहरहाल यहोवा ओनकर अपराध क याद रखत ह अउर ओनकर पाप क सज़ा देत ह।

मूर्ति पूजा क कारण इस्त्राएल क विनास

10जब मई इस्त्राएल क पाएस, मई यहोवा बहोत खुस भाव जइसा कउनो मनई रेगिस्ताने में अंगूर पाएस ह। जब मई तोहार पुरुखन क लेखस, मई महसूस किह्या कि जइसा कि ऋतु क सुरुआत में अंजीर क बृच्छ पइ कउनो क अंजीर क पहिले फल मिलत हीं। मुला उ पचे तउ बाल-पेऑर* क लगे चला गएन अउर बाल देवतन क भक्त होइ गएन। उ पचे घृणित देवतन क जइसा होइ गएन जेका उ पिरेम करत रहेन।

इस्त्राएलियन क बंस नहीं बाढ़ी

11एप्रैम क महिमा एक चिड़िया क नाई उड़त हीं। उ पचे एकर पाछे न कउनो गरभ धारण करी, या न गरभवती होइ, या न कउनो गदेलन जन्म देइहीं।

12मुला भले ही इस्त्राएली आपन गदेलन पाल भी लेइहीं तउ भी सब बेकार होइ जाइ। मई ओनसे ओनकर गदेलन छोर लेब। ओकर लगे सिरिफ मुसीबतन ही रहइ काहेकि मई ओनसे मुडि जाब।

13मई लखत हउँ कि एप्रैम आपन सन्तानन क एक फँदा कइँती लइ जात अहइ। एप्रैम आपन गदेलन क इ हत्यारा क लगे बाहेर लइ जात अहइ।

14हे यहोवा, तू ओनका का देइ चाहत अहइ? ओनका अइसा गर्भ द्या, जेका गर्भपात होइ जात ह। ओनका अइसेन थन दइ द्या जउन दूध नहीं देइ सकी।

15उ पचे गिलगल में बहोत सारा बुरा काम किहेन रहेन! मई ओनसे ओकरे काम क कारण घिना करइ सुरू किहे रहेउँ। मई ओनका आपन घरे स निकरि फेंकब, मई ओनसे अब पिरेम नहीं करत रहब। ओनकर सबहिं मुखिया लोग मोर खिलाफ मुडि गवा अहइँ।

16एप्रैम पइ मसीबत आएस ह। उ पचे पूरी तरह उपजहीन होइ जाई। जदपि उ कउनो गदेलन क जन्म देई, मई ओकरे

बाल पेऑर इ भवा जब मूसा इस्त्राएलियन क रेगिस्ताने में अगुवाइ करत रहा। पढ़ा गनती 25:1-5

कीमती गदेलन क मार डाउब जइसे ही उ ओका जन्म देब्या।

17मोर परमेस्सर ओका अस्वीकार करिहीं, काहेकि उ पचे मोका नहीं सुनिही। इहइ कारण अहइ कि उ पचे जातियन क बीच में भटकत रहिहीं।

इस्त्राएल क बैभव इस्त्राएल स मूर्ति पूजा करवाएस

10 इस्त्राएल एक ठु अइसी दाख-लता अहइ जेह पइ बहोत सारा फल लागत हीं। उ जेतना फल देत हीं ओतना ही वेदियन बनत ही। जब भूइँया नीक फसल पइदा करत ह, तउ इस्त्राएल जियादा स जियादा महँगा स्मृति पाथर लबार देवतन क मान देइ बरे लगावत ह। 2इस्त्राएल क लोग आपन हिरदयन में परमेस्सर क धोखा देइ क जतन किहेस, यह बरे ओका ओकरे पाप क बदले में जरूर सज़ा दीन्ह जाइ चाही। यहोवा खुद ही ओकार वेदियन क तोड़े देब अउर अउर उ ओनकर स्मृति-स्तूपन क तहस-नहस करब।

यहोवा इस्त्राएलियन क राज लइ लेब

3अब इस्त्राएल क लोग कहा करत हीं, “न तउ हमार कउनो राजा अहइ अउर न ही हम यहोवा क मान करित ह। अउर ओकर राजा हमार कछू बिगारि नहीं सकत ह।”

4ओकर बचन सिरिफ एक सब्दन अहइँ। उ आपन प्रतिग्या क पूरा नहीं किहेस अउर करार क तोड़ दिहेस। हिऑ बहोत स अदालत क मुकद्दमा अहइँ जइसा खेत में उगा भवा खरपतवार।

5सोमरोन क लोग बेतावेन में बछवन क पूजा करत हीं अइसे लोग क असलियत में विलाप करिहीं। ओन याजक लोग असलियत में विलाप करिहीं काहेकि ओकर सुन्नर मूर्ति खो गइ अहइ। काहेकि ओकर महिमामय मूर्तियन क लइ लीन्ह जाब। 6उ पचे अस्सूर राजा क लगे उपहार क रूप लइ लेइ जाब्य जउन हमेसा ओकर संग जुद्ध करत हीं। एप्रैम लज्जित होइहीं, अउर इस्त्राएल आपन मूर्तियन पइ लजाइ। 7सोमरोन क लबार देवतन क बर्बाद कइ दीन्ह जाइ। उ पानी पइ उतरत भए कउनो काठे क टूका जइसा होइ जाइ।

8जउन ठउरन पइ इस्त्राएल पाप किहेस नस्ट कीन्ह जाब्या। ओनकर वेदियन पइ कौंटन अउ घास-फूस उगिहीं। उ पचे पहाड़न स कइहीं, “हमका ढाँपि ल्या” अउर पहाड़िन स कइहीं, “हम पइ भहराइ पड़ा।”

इस्त्राएल क आपन पापे क भुगतान करइ होइ

9हे इस्त्राएल, तू गिबा क समइ स ही पाप करत आया, अउर तू पचे वइसा ही हुओँ भी सुरू कइ दिहेस ह। का गिबा क जउन लोगन बुरा काम किहे रहेन फुरइ जुद्ध क चपेटे में नहीं आहइँ? 10मई आउब अउर ओनका सज़ा देब। मई जातियन क ओनके खिलाफ बटोरब अउर ओनका ओकरे दुई ठू पापन कारण जंजीर स बाँधिहीं।

11एप्रैम एक ठू जवान प्रसिच्छत गइया क नाई अहइ जउन खरिहाने में अनाज माँइइ पसन्द करत अहइँ। मई ओकरे गटइ पइ जुआ राखब। किन्तु अब मई ओका खेत

जोताई मैं जियादा कठिन काम देब। मई ओह पड़ लसुरी लगाउब। यहूदा भुईया जोतब अउर याकूब कठोर धरती क फोड़ब। 12तोहका आपन प्रतिग्या क पूरा कइके नीक करम बोइ चाही, तउ तू सच्चा पिरेम क फसल काटब्या। इ तोहार बरे नई बात होब्या। इ अइसे धरती क जोतइ क जइसा होइ जेका तू फसल बरे कबहूँ उपयोग नहीं किहेस। यहोवा क आसीबाद लेइ क समइ अहइ जब तक कि उ तोह पड़ बर्खा क रूप में नीक चिजियन नहीं देइ।

13मुला तू तउ बदी क एक बिआ बोया ह; तू पचे आपन झूठ क फल भोग्या ह। अइसा एह बरे भवा कि तू आपन रथन पड़ निर्भर रह्या अउर आपन फउजियन पड़ बिस्सास किहा। 14जुद्ध क सोर तोहार लोगन क खिलाफ जियाद स जियाद बढ़िहीं। तोहार सारे गढ़ियन वइसी भहराइ जइसे बेतअरबेल सहर क जुद्ध क समइ सल्मन बर्बाद कइ दीन्ह ग रहा। दुइनउँ महतारी अउर गदेलन क टूका कीन्ह ग रहा। 15हे बेतेल, इ तोहार संग होइ काहेकि तू बहोत स कुकर्म किहा ह! भिसारे ही इस्राएल क राजा क पूरी तरह विनास कीन्ह जाब्या।”

इस्राएल यहोवा क बिसरि गवा

11 “जब इस्राएल अबहीं गदेलन रहा, मई, (यहोवा) ओहसे पिरेम किहे रहेउँ। मई आपन गदेलन क मिस्त्र स बाहर बोलाइ लिहे रहेउँ।

2मुला मई ओका जेतना जियाद बोलाएउँ उ पचे मोहसे ओतना ही जियादा दूर होइ गए रहेन। उ पचे बाल देवतन क बलियन चढ़ाए रहेन अउर मूरतियन क अगवा धूप बारे रहेन।

3उ मई ही अहउँ जउन एप्रैम चलब सिखाएस। मई इस्राएल क आपन बाँहन में लिहे रहेउँ, मुला उ नहीं जानत ह कि कउन ओका तन्दुरुस्त किहेस ह।

4मई ओनका पिआर अउ स्नेह क “लसुरी” स अगुवाइ किहे रह्या। मई ओकरे गटइ स जुआ क हटाइ दिहेस अउर विनम्रता स खिलाएस ह।

5मुला उ पचे मोर कइँती नहीं मुड़ब्या! नहीं, उ पचे मिस्त्र चला गएन या आपन राजा अस्सूर क राजा क लगे गएन। उ पचे मोर कइँती वापिस आवइ स इन्कार करत ह। 6ओनकर सहरन क ऊपर लटकत भवा तरवार ओनकर सबइ ताकतवार मनइयन क ओनकर बुरे जोजना क कारण बर्बाद कइ देइहीं।

7“मोर लोग मोह स मुड़ि जाब अउर उ एका नहीं रोक सकब। उ पचे आपन मदद बरे बाल देवता क पुकारिस, का उ ओका बचा सकेस?”

यहोवा इस्राएल क बिनास नहीं चाहत

8“हे एप्रैम, मई तोहका तजि देइ नहीं चाहत हउँ। हे इस्राएल, मई चाहत हउँ कि मई तोहार रच्छा करउँ। मई तोहका अदमा क तरह नहीं कइ देइ चाहत हउँ। मई नहीं चाहत हउँ कि तोहका सबोर्याम जइसा बनाइ देउँ। मई आपन मन बदलत हउँ तोहरे बरे पिरेम बहोत गहिर अहइ।

9मई आपन भयंकर किरोध क जीतइ नहीं देब। मई फुन एप्रैम क बर्बाद नहीं कइ देब। मई तउ परमेस्सर अहउँ, मई

कउनो मनई नहीं। मई तउ उ पवित्तर हउँ, मई तोहरे संग हउँ। मई आपन किरोध क नहीं देखाउब।

10मई सेर क दहाइ स गर्जन करब। मई गर्जन करब अउर मोरी संतानन निचके अइहीं अउर मोरे पाछे चलिहीं। मोर संतानन जउन डर स थर-थर काँपति अहइँ, पच्छिम स अइहीं।

11उ पचे काँपकाँपात चिड़ियन स मिस्त्र स अइहीं। उ पचे काँपत कबूतरे क नाई अस्सूर क धरती स अइहीं अउर मई ओनका ओनके घर वापस लइ जाब।” यहोवा इ कहे रहा।

12एप्रैम मोर बरे बहोत सारा लबार बोलेस; इस्राएल क घर मोर बरे बहोत सारा गलत बातन बोलेस। मुला अबहीं भी यहूदा परमेस्सर क सेवा* करत रहेन अउर उ पवित्तर क बरे विस्सासी अहा।”

यहोवा इस्राएल क खिलाफ रहा

12 एप्रैम हवा पकड़इ क जतन करत ह। उ पचे सारे दिन पूर्वी हवा क पाछा करत रहत ह। सारा रास्ट्र बेईमानी अउर हिसा में व्यस्थ अहइ, उ पचे अस्सूर क संग संधि किहेन। उहइ समइ नज़ाराना क रूप में मिस्त्र क तेल भेजत ह।

2यहोवा कहत ह, “इस्राएल क खिलाफत में मोर एक अभियोग अहइ। याकूब जउन करम किहेन ह, ओका ओनके बरे सजा दीन्ह जाइ चाही। आपन किए भए कुकरमन बरे ओका निहचइ ही सजा दीन्ह जाइ चाही। 3अबहीं याकूब आपन माता क गरभ में ही रहा कि उ आपन भाई क संग चालबाजी करब सुरू कइ दिहस। याकूब एक तु सक्तीवाला युवक रहा अउर उ समइ उ परमेस्सर क संग कुस्ती लड़े रहा। 4याकूब परमेस्सर क सरगदूत स कुस्ती लड़ेस अउ ओका जीत लिहस। उ गोहराएस अउर कृपा करइ बरे बिनती किहस। इ बेतेल में भवा रहा। उ जगह पड़ उ ओहसे बातचीत किहे रहा। 5हाँ, यहोवा फउजन क परमेस्सर अहइ। ओकर नाउँ यहोवा अहइ। 6तउ आपन परमेस्सर कइँती लउटि आवा। ओकरे बरे वफ़ादार रहा। निआव अउर दयालुता कायम रखा। हमेसा आसावादी रहा कि परमेस्सर आपन वाचा क पूरा करब्या।

7“याकूब अइसा व्यापारी क तरह अहइ जउन लोगन स छल करइ बरे गलत तराजू क उपयोग करत ह। 8एप्रैम कहेस, ‘मई धनवान हउँ। मई सच्ची सम्पत्ति पाइ लिहे अहउँ। मोरे अपराधन क कउनो मनई क पता ही नहीं चली। मोरे पापन क कउनो मनई जान ही नहीं पाई।’

9“मुला मई तउ तबहिं स तोहार परमेस्सर यहोवा हउँ जब तू मिस्त्र क धरती स आवा रहा, जब मई तोहका रेगिस्तान में तम्बुअन में राखे रहा, ठीक वइसा ही जइसा कि पनाह क त्यौहार क समइ में रहा करत रहेन। 10मई नबियन स बात किहेउँ। मई ओनका अनेक दर्सन दिहेउँ। मई नबियन क तू पचन्क आपन पाठ पढ़ावइ क बहोत स तरिका दिहेउँ। 11मुला गिलाद में अबहुँ भी पाप अहइ। हुआँ बियर्थ देवतन अहइँ। गिलगाल में लोग बर्धन क बलियन क अर्पण करत हीं। हुवाँ बहुत स वेदियन में जोते भए खेते क कतारन क

परमेस्सर क सेवा साबित परमेस्सर क साथ चलत ह।

नाई अहई। 12याकूब आराम क भुईया कइँती भाग गवा। उ पचे दास क नाई काम किहेन जे आपन दुई ठू पत्नियन पावइ खातिर भेड़िन क निगरानी किहेस। 13तब यहोवा एक ठु नबी क जरिये इस्राएल क मिस्त्र स बाहेर लाएस, अउर पाछे दूसर नबी दुआरा इस्राएल क सुरच्छा किहेस। 14मुला एप्रैम यहोवा क बहोत जियादा गुस्साइ दिहस, एह बरे परमेस्सर यहोवा एका आपन अपराधन बरे भुगतवाएस। ओकर सुआमी (परमेस्सर) ओहसे ओकर लज्जा बरदास्त करइ देइ।”

इस्राएल आपन नास खुद किहस

13 “एप्रैम बंसज इस्राएल क तमाम जातियन क बीच में बहोत जियादा सक्तीसाली बनि गवा। एप्रैम जब बोला करत रहा, तउ लोग काँपात रहेन। मुला एप्रैम मरि गवा, कहेकि उ बाल देवता क पूजइ क कारण पाप किहे रहा। 2अउर अब उ पचे अपने बरे मूरतियन बनाइके लगातार पाप किहेन। ओकर कुसल कारीगर आपन सबसे अच्छा कुसला स ओकर चित्रन क तरासइ लागेन। तउ उ पचे ओन चित्रन स बातन करइ लागेन अउर उ सबइ लोग ओन बखवा क चित्रन चूमइ लागेन। 3इहइ कारण उ पचे भिसारे क उ कोहरा अउ भिसारे क ओस क नाई नज़र स ओझल होइ जाइहीं। जउन गायब होइ जात ह। उ पचन्क उ भूसा क तरह उड़ा लेजाइ चाही जेका खरिहाने स उड़ा जात ह। उ पचे उ धुआँ क समान होइहीं जउन कउनो चिमनी स उठत ह अउर लुप्त होइ जात ह।

4“तू लोग जब मिस्त्र में भवा करत रहया, मई तबहिं स तोहार परमेस्सर यहोवा अहउँ। मोका तजिके तू पचे कउनो परमेस्सर क नाहीं जानत रहया। मोर इलावा तोहका कउनो नाहीं बचाइ सकत ह। 5बयाबान में, हाँ, सूखा रेगिस्ताने में जहाँ पानी नाहीं होइ, मई तू सबन्क धियान दिहे रहया। 6मई इस्राएलियन क खाइ क दिहेउँ। उ पचे उ भोजन खाएन। आपन पेट भरिके उ पचे तृप्त होइ गएन। ओनका घमंड होइ गवा अउर उ पचे मोका बिसरि गएन।

7“मई इहइ बरे सरे क तरह होइ जाबउँ। मई राहे पइ घात लगाए भए चीता जइसा होइ जाब। 8मई ओन पइ उ रीछनी क तरह झपट पड़ब, जेहसे ओकर गदेलन छोर लीन्ह गवा होई। मई ओन पइ हमला करब। मई ओनकर छातियन क चीर फाड़ देबउँ। मई उ सेर या कउनो दूसर अइसे हिसंक पसु क तरह होइ जाबँउ जउन आपन सिकार क फारिके खात रहत होत ह।”

परमेस्सर क किरोध स इस्राएल क कउनो बचाइ नाहीं सकत

9“हे इस्राएल, मई तोहार रच्छा किहे रहेउँ, मुला तू मोसे मुँह मोड़ लिहा। तउ अब मई तोहार नास करब 10तोहार राजा कहाँ बाटइ जउन तोहरे सबहिं नगरन में तोहका बचाइ? कहाँ बाटइ तोहार सासक जेहसे तू आपन जरूरत क मागत ही कि “मोका एक राजा अउर राजकुमार दया।” 11मई कोहाइ गएउँ अउर मई तू पचन्क एक राजा दइ दिहेउँ। मई

अउर जियादा कोहाइ गएउँ अउर मई तू पचन्स ओका छोरि लिहेउँ।

12एप्रैम आपन अपराध छुपावइ क जतन किहस, उ सोचे रहा कि ओकर पाप गुप्त अहई। मुला ओन बातन बरे ओका सजा दीन्ह जाइ।

13ओकर सजा अइसी होइ जइसे कउनो मेहरारू एक बच्चा क जमन देइ क जतन करत अहइ, मुला उ बच्चा बुद्धिमान नाहीं होइ। हिआँ तलक कि जब समइ आइ, उ गरभ स बाहेर नाहीं निकरी।

14का मई ओनका गढ़ा स बचाइ लेब? नाहीं, मई नाहीं बचाब! का मई ओनका मउत क पकड़ स बचाइ लेब? नाहीं! मई नाहीं बचाब! हे मउत, आपन महामारियन ओन पइ लावा! हे कब्र, आपन तबाही ओन पइ लावा! मई ओह पइ कउनो दया नाहीं देखाउब।

15सायद उ कछू समइ क लिए सरकण्डा क पउथा क नाई बढ़इ जारी रखिहीं। मुला गरम पुर्वी हवा आउब्या, अउर यहोवा क कइँती स, रेगिस्तान स आउब्या। परिणाम ओकर झरना सूख जाई; अउर पानी क स्रोत सूख जाई। उ हवा ओकर सबइ खज़ाना उड़ा लेजाइहीं जेका उ आपन गोदाम में जमा किहे रहया ह।

16“सोमरोन क सजा दीन्ह जाइ काहेकि उ आपन परमेस्सर स मुँह फेरे रहा। इस्राएलियन तरवारे स मार दीन्ह जइहीं। ओनकर संतानन क चिथरा उड़ाइ दीन्ह जाइ। ओनकर गाभिन मेहररुअन चीरिके खोल दीन्ह जइहीं।”

यहोवा कइँती मुड़ब

14 हे इस्राएल, तोहार पतन भवा अउर तू परमेस्सर क खिलाफ पाप किहा। एह बरे अब तू पचे आपन परमेस्सर यहोवा कइँती लौटि आवा। 2यहोवा कइँती लौटि आवा अउर आपन जिन्नगी क बदल दे! यहोवा स कहा, “हमरे तमाम पापन माफ़ करा, मोर पराथना क सुना। बलिदान क जगह पइ हम पचे आपन मुँह स तोहार स्तुति कइके तोहका भेंट करत हउँ।

3अस्सूर हमका बचाइ नाहीं सकब, हम पचे जुद्ध क घोड़न पइ सवार नाहीं होब्या। हम पचे तोहसे प्रतिग्या करत हउँ कि तोहका उ मूरतियन क जइसा नाहीं समुझब जेका हम आपन ही हाथन स बनाएस ह। काहेकि तू उहइ परमेस्सर अहइ जउन अनाथ बच्चन पइ दया देखवइवाला ह तू हम पचन पइ भी दया देखाउब।”

यहोवा इस्राएल क छिमा करी

4यहोवा कहत ह, “उ पचे मोका तजि दिहन। मई ओनका एकरे बरे छिमा कइ देब। मई ओनसे मुक्त भाव स पिरेम करबउँ। मई अब ओन पइ कोहान नाहीं अहउँ।

5मई इस्राएल बरे ओस क नाई होइ जाब। चमेली क नाई खिलब। उ लबानोन क देवदार बृच्छन नाइ बढ़ब्या।

6उ नवा डारन निकारइ सुरू करब्या। उ जइतून क बृच्छ क नाई सुन्नर होब्या। अउ ओकर सुगंध देवदार बृच्छन क नाई होब्या।

7“इस्राएल फुन स उ लोगन क सहारा देइ जेका मदद क जरूरत अहइ। उ पचे अन्न क नाई या अंगूरे क बेल क नाई जउन कि बृच्छ क छाया में बढत ह। इस्राएल लबानोन क दाखरस क तरह प्रसिद्ध होइहीं।”

इस्राएल क मूरतियन क बारे में यहोवा क चितउनी

8“हे एप्रैम, मोका मूरतियन क बराबर जिन समुझा। उ मई ही अहउँ जउन सरग में स तोहका बचाएस। मई एक

सदाबहार सनोवार क बृच्छ क नाई हउँ। तोहार फल मोहसे ही आवत हीं।”

अन्तिम सम्मति

9बुद्धिमान कउन अहइ? ओन व्यक्ति क एन बातन समुझइ द्या! कउनो समुझ रहत ह उ व्यक्ति क सच्चाइ क समुझइ द्या। काहेकि यहोवा क रहन नीक अहई। अच्छे लोग ओन पइ चलिहीं, लेकिन बिद्रोही लोग ओह पइ ठोकर खाइहीं।

License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at distribution@wbtc.com.

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: info@wbtc.com

WBTC's web site – World Bible Translation Center's web site: <http://www.wbtc.org>

Order online – To order a copy of our texts online, go to: <http://www.wbtc.org>

Current license agreement – This license is subject to change without notice. The current license can be found at: <http://www.wbtc.org/downloads/biblelicense.htm>

Trouble viewing this file – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

Viewing Chinese or Korean PDFs – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>